

梁書卷十九

列傳第十三

宗夬

劉坦

樂藹

宗夬字明敷南陽涅陽人也世居江陵祖景宋時徵太子庶子不就有高名父繁西中郎諮議參軍夬少勤學有局幹弱冠舉郢州秀才歷臨川王常侍驃騎行參軍齊司徒竟陵王集學士於西邸竝見圖畫夬亦預焉永明中與魏和親勅夬與尙書殿中郎任昉同接魏使皆時選也武帝嫡孫南郡王居西州以夬管書記夬旣以筆札被知亦以貞正見許故任焉俄而文惠太子薨王爲皇太孫夬仍管書記及太孫卽位多失德夬頗自疏得爲秣陵令遷尙

書都官郎隆昌末少帝見誅寵舊多懼其禍惟夬及傅昭以清正
免明帝卽位以夬爲郢州治中有名稱職以父老去官還鄉里南
康王爲荊州刺史引爲別駕義師起遷西中郎諮議參軍別駕如
故時西土位望惟夬與同郡樂藹劉坦爲州人所推信故領軍將
軍蕭穎胄深相委仗每事諮焉高祖師發雍州穎胄遣夬出自楊
口面稟經略竝護送軍資高祖甚禮之天興初遷御史中丞以父
憂去職起爲冠軍將軍衛軍長史天監元年遷征虜長史東海太
守將軍如故二年徵爲太子右衛率是冬遷五兵尙書參掌大選
三年卒時年四十九子曜卿嗣夬從弟岳有名行州里稱之出於
夬右仕歷尙書庫部郎郢州治中北中郎錄事參軍事
劉坦字德度南陽安衆人也晉鎮東將軍喬之七世孫坦少爲從
兄虬所知齊建元初爲南郡王國常侍尋補孱陵令遷南中郎錄

事參軍所居以幹濟稱南康王爲荊州刺史坦爲西中郎中兵參軍領長流義師起遷諮議參軍時輔國將軍楊公則爲湘州刺史帥師赴夏口西朝議行州事者坦謂衆曰湘境人情易擾難信若專用武士則百姓畏侵漁若遣文人則威略不振必欲鎮靜一州城軍民足食則無踰老臣先零之役竊以自許遂從之乃除輔國長史長沙太守行湘州事坦嘗在湘州多舊恩道迎者甚衆下車簡選堪事吏分詣十郡悉發人丁運租米三十餘萬斛致之義師資糧用給時東昏遣安成太守劉希祖破西臺所選太守范僧簡於平都希祖移檄湘部於是始興內史王僧粲應之邵陵人逐其內史褚洊永陽人周暉起兵攻始安郡竝應僧粲桂陽人邵曇弄鄧道介報復私讎因合黨亦同焉僧粲自號平西將軍湘州刺史以永陽人周舒爲謀主師於建寧自是湘部諸郡悉皆蜂起惟臨

湘湘陰瀏陽羅四縣猶全州人咸欲汎舟逃走坦悉聚船焚之遣將尹法略拒僧粲相持未決前湘州鎮軍鍾玄紹潛謀應僧粲要結士庶數百人皆連名定計刻日反州城坦聞其謀僞爲不知因理訟至夜而城門遂不閉以疑之玄紹未及發明旦詣坦問其故坦久畱與語密遣親兵收其家書玄紹在坐未起而收兵已報具得其文書本末玄紹卽首伏於坐斬之焚其文書其餘黨悉無所問眾愧且服州部遂安法略與僧粲相持累月建康城平公則還州羣賊始散天監初論功封荔浦縣男邑三百戶遷平西司馬新興太守天監三年遷西中郎卒時年六十二子泉嗣

樂藹字蔚遠南陽滄陽人晉尙書令廣之六世孫世居江陵其舅雍州刺史宗慤嘗陳器物試諸甥姪藹時尙幼而所取惟書慤由此奇之又取史傳各一卷授藹等使讀畢言所記藹略讀具舉慤

益善之宋建平王景素爲荊州刺史辟爲主簿景素爲南徐州復爲征北刑獄參軍遷龍陽相以父憂去職吏民詣州請之葬訖起焉時齊豫章王嶷爲武陵太守雅善藹爲政及嶷爲荊州刺史以藹爲驃騎行參軍領州主簿參知州事嶷嘗問藹風土舊俗城隍基跣山川險易藹隨問立對若按圖牒嶷益重焉州人嫉之或譖藹解門如市嶷遣覘之方見藹闇閣讀書嶷還都以藹爲太尉刑獄參軍典書記遷枝江令還爲大司馬中兵參軍轉署記室永明八年荊州刺史巴東王子響稱兵反旣敗焚燒府舍官曹文書一時蕩盡武帝引見藹問以西事藹上對詳敏帝悅焉用爲荊州治中敕付以脩復府州事藹還州繕脩廨署數百區頃之咸畢而役不及民荆部以爲自晉王悅移鎮以來府舍未之有也九年豫章王嶷薨藹解官赴喪率荆湘二牧故吏建碑墓所累遷車騎平西

錄事參軍步兵校尉求助戍西歸南康王爲西中郎以藹爲諮議
參軍義師起蕭穎胄引藹及宗夬劉坦任以經略梁臺建遷鎮軍
司馬中書侍郎尙書左丞時營造器甲舟艦軍糧及朝廷儀憲悉
資藹焉尋遷給事黃門侍郎左丞如故和帝東下遷兼衛尉卿天
監初遷驍騎將軍領少府卿俄遷御史中丞領本州大中正初藹
發江陵無故於船得八車幅如中丞健步避道者至是果遷焉藹
性公彊居憲臺甚稱職時長沙宣武王將葬而車府忽於庫火一作先
油絡欲推主者藹曰昔晉武庫火張華以爲積油萬石必然今庫
若有灰非吏罪也旣而檢之果有積灰時稱其博物弘恕焉二年
出爲持節督廣交越三州諸軍冠軍將軍平越中郎將廣州刺史
前刺史徐元瑜罷歸道遇始興人士反逐內史崔睦舒因掠元瑜
財產元瑜走歸廣州借兵於藹託欲討賊而實謀襲藹藹覺之誅

元瑜尋進號征虜將軍卒官謫姊適徵士同郡劉虬亦明識有禮訓謫爲州迎姊居官舍參分祿秩西土稱之子法才字元備幼與弟藏俱有美名少遊京師造沈約約見而稱之齊和帝爲相國召爲府參軍鎮軍蕭穎胄辟主簿梁臺建除起部郎天監二年謫出鎮嶺表法才畱任京邑遷金部郎父憂去官服闋除中書通事舍人出爲本州別駕入爲通直散騎侍郎復掌通事遷尙書右丞晉安王爲荊州重除別駕從事史復徵爲尙書右丞出爲招遠將軍建康令不受俸秩比去任將至百金縣曹啟輸臺庫高祖嘉其清節曰居職若斯可以爲百城表矣卽日遷太府卿尋除南康內史恥以讓俸受名辭不拜俄轉雲騎將軍少府卿出爲信武長史江夏太守因被代表便道還鄉至家割宅爲寺棲心物表皇太子以法才舊臣累有優令召使東下未及發而卒時年六十三

陳吏部尙書姚察曰蕭穎冑起大州之眾以會義當其時人心未
之能悟此三人者楚之鎮也經營締構蓋有力焉方面之功坦爲
多矣當官任事藹則兼之咸登寵秩宜乎

梁書卷十九

列傳第十三

終

金陵書局所
藏古閣本

梁書卷二十

列傳第十四

劉季連

陳伯之

劉季連字惠續彭城人也父思考以宋高祖族弟顯於宋世位至金紫光祿大夫季連有名譽早歷清官齊高帝受禪悉誅宋室近屬將及季連等太宰褚淵素善之固請乃免建元中季連爲尙書左丞永明初出爲江夏內史累遷平南長沙內史冠軍長史廣陵太守竝行府州事入爲給事黃門侍郎轉太子中庶子建武中又出爲平西蕭遙欣長史南郡太守時明帝諸子幼弱內親則仗遙欣兄弟外親則倚后弟劉暄內弟江祐遙欣之鎮江陵也意寄甚隆而遙欣至州多招賓客厚自封植明帝甚惡之季連族甥琅邪

王會爲遙欣諮議參軍美容貌頗才辯遙欣遇之甚厚會多所傲忽於公座與遙欣競侮季連季連憾之乃密表明帝稱遙欣有異迹明帝納焉乃以遙欣爲雍州刺史明帝心德季連四年以爲輔國將軍益州刺史令據遙欣上流季連父宋世爲益州貪鄙無政績州人猶以義故善待季連季連下車存問故老撫納新舊見父時故吏皆對之流涕辟遂寧人龔愜爲府主簿愜龔穎之孫累世有學行故引焉東昏卽位永元元年徵季連爲右衛將軍道斷不至季連聞東昏失德京師多故稍自驕矜本以文吏知名性忌而褊狹至是遂嚴愜狠土人始懷怨望其年九月季連因聚會發人丁五千人聲以講武遂遣中兵參軍宋買率之以襲中水穰人李託豫知之設備守險買與戰不利退州郡縣多叛亂矣是月新城人趙續伯殺五城令逐始平太守十月晉原人樂寶稱李難當

殺其太守寶稱自號南秦州刺史難當益州刺史十二月季連遣參軍崔茂祖率眾二千討之齎三日糧值歲大寒羣賊相聚伐樹塞路軍人水火無所得大敗而還死者十七八明年正月新城人帛養逐遂寧太守譙希淵三月巴西人雍道晞率羣賊萬餘逼巴西去郡數里道晞稱鎮西將軍號建義巴西太守魯休烈與涪令李膺嬰城自守季連遣中兵參軍李奉伯率眾五千救之奉伯至與郡兵破擒道晞斬之涪市奉伯因獨進巴西之東鄉討餘賊李膺止之曰卒情將驕乘勝履險非良策也不如小緩更思後計奉伯不納悉眾入山大敗而出遂奔還州六月江陽人程延期反殺太守何法臧魯休烈懼不自保奔投巴東相蕭慧訓十月巴西人趙續伯又反有眾二萬出廣漢乘佛輿以五采裹青石誑百姓云天與我玉印當王蜀愚人從之者甚眾季連進討之遣長史趙越

常前驅兵敗季連復遣李奉伯由涪路討之奉伯別軍自潯亭與大軍會於城進攻其柵大破之時會稽人石文安守休隱居鄉里專行禮讓代季連爲尙書左丞出爲江夏內史又代季連入爲御史中丞與季連相善子仲淵字欽回聞義師起率鄉人以應高祖天監初拜郢州別駕從高祖平京邑明年春遣左右陳建孫送季連弟通直郎子淵及季連二子使蜀喻旨慰勞季連受命飭還裝高祖以西臺將鄧元起爲益州刺史元起南郡人季連爲南郡之時素薄元起典籤朱道琛者嘗爲季連府都錄無賴小人有罪季連欲殺之逃叛以免至是說元起曰益州亂離已久公私府庫必多耗失劉益州臨歸空竭豈辦復能遠遣候遞道琛請先使檢校緣路奉迎不然萬里資糧未易可得元起許之道琛旣至言語不恭又歷造府州人士見器物輒奪之有不獲者語曰會當屬人何

須苦惜於是軍府大懼謂元起至必誅季連禍及黨與競言之於季連季連亦以爲然又惡昔之不禮元起也益憤懣司馬朱士略說季連求爲巴西郡畱三子爲質季連許之頃之季連遂召佐史矯稱齊宣德皇后令聚兵復反收朱道琛殺之書報朱士略兼召李膺膺士略竝不受使使歸元起收兵於巴西以待之季連誅士略三子天監元年六月元起至巴西季連遣其將李奉伯等拒戰兵交互有得失久之奉伯乃敗退還成都季連驅略居人閉城固守元起稍進圍之是冬季連城局參軍江希之等謀以城降不果季連誅之蜀中喪亂已二年矣城中食盡升米三千亦無所糴餓死者相枕其無親黨者又殺而食之季連食粥累月饑窘無計二年正月高祖遣主書趙景悅宣詔降季連季連肉袒請罪元起遷季連于城外俄而造焉待之以禮季連謝曰早知如此豈有前日

之事元起誅李奉伯竝諸渠帥送季連還京師季連將發人莫之視惟龔愜送焉初元起在道懼事不集無以爲賞士之至者皆許以辟命於是受別駕治中檄者將二千人季連旣至詣闕謝高祖引見之季連自東掖門入數步一稽顙以至高祖前高祖笑謂曰卿欲募劉備而曾不及公孫述豈無臥龍之臣乎季連復稽顙謝赦爲庶人四年正月因出建陽門爲蜀人藺道恭所殺季連在蜀殺道恭父道恭出亡至是而報復焉

陳伯之濟陰睢陵人也幼有膂力年十三四好著獺皮冠帶刺刀候伺隣里稻熟輒偷刈之嘗爲田主所見呵之云楚子莫動伯之謂田主曰君稻幸多一擔何苦田主將執之伯之因杖刀而進將刺之曰楚子定何如田主皆反走伯之徐擔稻而歸及年長在鍾離數爲劫盜嘗授面覬人船船人斫之獲其左耳後隨鄉人車騎

將軍王廣之廣之愛其勇每夜臥下榻征伐嘗自隨齊安陸王子敬爲南兖州頗持兵自衛明帝遣廣之討子敬廣之至歐陽遣伯之先驅因城開獨入斬子敬又頻有戰功以勲累遷爲冠軍將軍驃騎司馬封魚復縣伯邑五百戶義師起東昏假伯之節督前驅諸軍事豫州刺史將軍如故尋轉江州據尋陽以拒義軍郢城平高祖得伯之幢主蘇隆之使說伯之卽以爲安東將軍江州刺史伯之雖受命猶懷兩端僞云大軍未須便下高祖謂諸將曰伯之此荅其心未定及其猶豫宜逼之眾軍遂次尋陽伯之退保南湖然後歸附進號鎮南將軍與眾俱下伯之頓籬門尋進西明門建康城未平每降人出伯之輒喚與耳語高祖恐其復懷翻覆密語伯之曰聞城中甚忿卿舉江州降欲遣刺客中卿宜以爲慮伯之未之信會東昏將鄭伯倫降高祖使伯倫過伯之謂曰城中甚忿

卿欲遣信誘卿以封賞須卿復降當生割卿手腳卿若不降復欲遣刺客殺卿宜深爲備伯之懼自是無異志矣力戰有功城平進號征南將軍封豐城縣公邑二千戶遣還之鎮伯之不識書及還江州得文牒辭訟惟作大諾而已有事典籤傳口語與奪決於主者伯之與豫章人鄧繕永興人戴永忠竝有舊繕經藏伯之息英免禍伯之尤德之及在州用繕爲別駕永忠記室參軍河南褚緡京師之薄行者齊末爲揚州西曹遇亂居閭里而輕薄互能自致惟緡獨不達高祖卽位緡頻造尙書范雲雲不好緡堅拒之緡益怒私語所知曰建武以後草澤底下悉化成貴人吾何罪而見棄今天下草創饑饉不已喪亂未可知陳伯之擁彊兵在江州非代來臣有自疑意且熒惑守南斗詎非爲我出今者一行事若無成入魏何遽減作河南郡於是遂投伯之書佐王思穆事之大見親